

Friday, July 1st, 2011

Լոս Անճելըսի Հայ Քոյրերու Վարժարանի Աւարտական Հանդիսութիւնները



ԼԻՆՏԱ ԳԱՆՏԻԼԵԱՆ

Հայ քոյրերու վարժարանը 2010-2011 տարեշրջանը եւս բոլորեց՝ յաջողութեամբ ամբողջացնելով եւ համալրելով իր դիմաց ծառայած բոլոր ծրագիրներն ու նպատակները: Վարժարանի երեք բաժիններն ալ՝ մանկապարտեզ, նախակրթարան եւ միջնակարգ, բոլորեցին իրենց ուսումնական ծրագիրները՝ պատրաստ փոխանցուելու յաջորդ ուսումնական շրջան: Շրջանաւարտները հպարտութեամբ ստացան իրենց վկայականները՝ բազմացնելով վարժարանի շրջանաւարտներու քսանհինգամեայ հունձքը:

Շաբաթ, Յունիս 11ի առաւօտեան տեղի ունեցաւ մանկապարտեզի հանդէսը, վարժարանի «Դանիէլեան» սրահին մէջ, ներկայութեամբ վարժարանիս քոյրերուն, հիւրերու եւ ծնողներու: Հանդիսութիւնը, սկսաւ մանկապարտեզի տնօրէնուհի Սօնա Գազանճեանի բացման խօսքով, ուր ան ներկաներուն բարի գալուստ մաղթելէ ետք, ծնողներուն ներկայացուց իրենց զաւակներուն կատարելագործած ծրագիրները եւ

հաստատեց, թե անոնք՝ այսօրուան վկայալները, արդէն իսկ պատրաստ են երթալու նախակրթարան, ապա իր շնորհակալական խօսքը ուղղեց ուսուցչական կազմին, որ անշահախնդրօրէն նուիրուած է այս փոքրերու մշակման դժուարին բայց նուիրական գործին:

Հանդիսութիւնը շարունակուեցաւ փոքրերու առաջնորդութեամբ. անոնք անհաւատալի գեղեցկութեամբ ներկայացուցին Յովհաննէս Թումանեանի նշանաւոր «Ոսկու Կարասը»՝ երգերով, պարերով, պատումներով եւ բեմադրութեամբ: Շրջանաւարտ դասարանի աշակերտները մասնագիտացած դերասաններու կարողութեամբ ներկայացուցին պատմութիւնը, զայն համեմելով եւ ներկաներու խանդավառութիւնը աճեցնելով՝ վերջին բաժինին իրագործուած հայկական հարսանիքով: Կրկին անգամ, ուսուցիչ ծնողք, ինչպէս միշտ, զարմանքի եւ գոհունակութեան զոյգ զգացումներն ու ապրումները ունեցան՝ ի տես այդ փոքրերու պատմութիւնը մեկնաբանելու կարողութեան, հայերէնի անթերի արտայայտութեան եւ անոնց ցուցաբերած բեմական կարողութեան: Յատկանշական էին բոլորն ալ, սակայն կարելի է առանձնացնել գլխաւոր դերակատարները, ինչպէս Ալեք Բագարեանը, որ թագաւորի դերով դարձած էր իսկական թագաւոր: Նաեւ Մուրատ Տէր Պետրոսեան եւ Արփիար Հարմանտեան, որոնք կը ներկայացնէին հողատէրն ու վարձուորը. անոնց երկար, բայց հասկնալի զրոյցները աննախընթաց էին:

Հանդիսութեան ւարտին, մեծ ծափողջիւններու տարափին տակ, փոքրիկ շրջանաւարտները ստացան իրենց վկայականները՝ անցնելու համար նախակրթարան:

Հանդիսութիւնը փակուեցաւ վարժարանիս տնօրէնուհի քոյր Լուսիայի փակման խօսքով: Ան շնորհաւորեց բոլոր ծնողները եւ շնորհակալութիւն յայտնեց ուսուցչական կազմին, որ այդպիսի եզակի հանդիսութիւն մը պատրաստած էր: Մեր ջերմագին շնորհաւորութիւնները մանկապարտէզի ծնողներուն եւ շրջանաւարտներուն:

Ութերորդ դասարանի պարագային, աշակերտները ոչ միայն հրաժեշտ պիտի տային միջնակարգին, այլ նաեւ պիտի բաժնուէին իրենց երկրորդ տունը դարձած վարժարանէն՝ հոն ձգելով իրենց կեանքի անմոռանալի առաջին յիշատակները: Ութերորդ դասարանի աշակերտներու հրաժեշտը իւրայատուկ է. ան կը սկսի Եկեղեցիով եւ աշակերտական վերջին պատարագով: Առ այդ, Կիրակի, Յունիս 5ին, Կլենտէլի Ս. Գրիգոր Լուսաւորիչ կաթողիկէ եկեղեցին տարբեր հանդիսաւոր երեւոյթ մը ստացած էր. արդարեւ, այդ օրը արարողութեան կը մասնակցէին վարժարանի ւարտական դասարանի աշակերտները: Անոնք տպաւորիչ թափօրով մուտք գործեցին եկեղեցիէն ներս, մասնակցեցան Ս. պատարագին, շնորհակալութիւն յայտնեցին Աստուծոյ, իրենց հոգիներուն մէջ քրիստոնէական առաջին սերմերը ցանող քոյրերուն, իր պատարագներով եւ դաստիարակիչ քարոզներով զիրենք

յորդորող վարդապետին, դաստիարակներուն ու ծնողներուն, ապա իրենց ուխտը կատարեցին՝ խոստանալով ըլլալ լաւ քաղաքացիներ եւ պատուաբեր հայ քրիստոնիսներ:

Բոլոր շրջանաւարտներն ալ մասնակցեցան պատարագին, ընթերցուածները կարդացին Սեւակ Համպոյեան՝ անգլերէնով, եւ Սարին Օհաննէսեան՝ հայերէնով, մինչ իրենց սրտին խօսքը երկլեզու ներկայացուցին Շահէ Գազայեան եւ Փօլ Եղիայեան: Յուզումնալից արարողութեան ւարտին, ծնողք, աշակերտ ու դաստիարակ, հոգեկան մեծ բաւարարութեամբ վերադարձան տուն՝ կրկին հանդիպելու յաջորդ Կիրակի:

Յունիս 12ի յետմիջօրէին տեղի ունեցաւ միջնակարգի ւարտական հանդէսը «Դանիէլեան» սրահէն ներս, ներկայութեամբ Ս. Գրիգոր Լուսաւորիչ եկեղեցւոյ ժողովրդապետ հայր Գրիգոր Շահինեանի, քոյրերու, ուսուցչական կազմի անդամներու, ծնողներու եւ հիւրերու:

Հանդիսութիւնը պաշտօնապէս ընթացք առաւ աշակերտներու յաղթական սրահ մուտքով, ապա յայտագիրը սկսաւ աշակերտներու կողմէ Տէրունական աղօթքի եւ քայլերգներու երգեցողութեամբ, եւ շարունակուեցաւ պաշտօնական խօսքերով՝ անգլերէն եւ հայերէն, ներկայացուած տնօրէնուհի քոյր Լուսիայի եւ դաստիարակներ Լինտա Գանտիլեանի ու Ուիլերմ Պասեթի կողմէ: Աշակերտութեան կողմէ ուղերձ կարդացին Ալեք Քիլիսեան (հայերէն), Նարեկ Պուլտուքեան (անգլերէն), Շահէ Գազազեան (սպաներէն), իսկ աշակերտական խորհուրդին կողմէ խօսք առաւ Արին Շահճահանեան:

Օրուան հիւր պատգամաբերն էր Ֆիլատելֆիոյ Հայ Քոյրերու վարժարանի շրջանաւարտներէն Վիգէն Գապագեան, որ իր կեանքի օրինակով պատգամ տուաւ շրջանաւարտներուն՝ յորդորելով զանոնք օգտուիլ բոլոր պատեհ առիթներէն, տրամադրելով նաեւ հաճոյքի ժամանակ, բայց միշտ մնալով ապահով:

Հանդիսութիւնը շարունակուեցաւ հայերէն եւ անգլերէն ոտանաւորներով, խմբերգներով: Յայտագիրը ճոխացուցին Սարին Օհաննէսեան եւ Մարալ Քիւրտեան, նուագելով ջութակի վրայ հայկական եւ օտար դասական երաժշտութիւններ օրինակներ, սակայն յայտագիրի գլուխ գործոցը եղաւ Արին Շահճահանեանի եւ ուսուցչուհի Վարդուհի Պաղտասարեանի ներկայացուցած Արամ Խաչատրեանի «Սուրերու Պարը» հրաշալի «տուէթը»:

Այս տարուան հանդիսութիւնը իր ներկայութեամբ կը պատուէր յարգելի հիւր մը՝ դոկտ. Միլվա Գարայեանը: Ան, հոգեբանութեան եւ մանկավարժութեան դասախօս է եւ միաժամանակ՝ նոյն ամպիոնին վարիչը՝ «California Lutheran» համալսարանին մէջ, նաեւ հիմնադիրն ու պատասխանատուն է ազգանուիրումի եւ հայապահպանման

նպատակով 2006ին յառաջացած ՀԲԸՄ Երուանդ Պապայեան մանկավարժական հիմնարկին:

Դոկտ. Գարայեանի ներկայութիւնը մեր վարժարանի հանդիսութիւններուն նախընթաց ունէր, սակայն այդ օրուանը տարբեր էր՝ քաջալերական եւ խրախուսիչ: «Պապայեան» հիմնարկին կողմէ վարժարանս ընտրուած էր իբրեւ «2011 Տարուան ամենէն կենսունակ եւ բազմաբողբ հայագիտական բաժանմունքը, առ ի գնահատանք տնօրէնուհիին եւ ուսուցչական կազմին անսահման եւ ամբողջական նուիրումին, ի նպաստ հայ մատղաշ սերունդի որակաւոր դաստիարակութեան եւ հայակերտման վսեմ գործին»: Բեմ հրաւիրուեցաւ դոկտ. Գարայեան, որ դրուատեց վարժարանէս ներս տարուած աշխատանքը ընդհանրապէս, եւ հայկական բաժանմունքին տարած գործունէութիւնը՝ մասնաւորապէս, ապա գնահատագիր մը եւ 500 տոլար յանձնեց տնօրէնուհիին:

Շրջանաւարտ աշակերտները իրենց վկայականներուն եւ նուէրներուն հետ ստանձնեցին նաեւ գնահատագրեր եւ փոխանձագրեր, իսկ հանդիսութեան աւարտին, երբ տիկին Արմինէ Շէրիկեան յայտարարեց շրջանաւարտները՝ «2011 տարուան աւարտական դասարան», ներկաներու ծափողջիւններու եւ ուրախութեան արտայայտութիւններու մթնոլորտին մէջ, աշակերտները մէկ կողմ թողելով իրենց գլխարկները՝ հեռացան սրահէն, մինչ «Վերջին Չանգը»ի երաժշտութեան արձագանգը տակաւին կը յամենար դպրոցի պատերէն ներս: Երեկոն շարունակուեցաւ «De Luxe» ճաշասրահին մէջ, մինչեւ ուշ ժամեր՝ ուրախութիւնը հասցնելով գագաթնակէտին:

Կը շնորհաւորենք բոլոր շրջանաւարտները. կը շնորհաւորենք եւ կը գնահատենք բոլոր ծնողները եւ դաստիարակները, որոնք համագործակցաբար անգամ մը եւս կրցան հայորդիներու պատրաստուած խումբի մը սլացք տալ դէպի տարբեր երկրորդական վարժարաններ: Մեր մաղթանքն է յարատեւ եւ աննկուն կամք՝ մեր շրջանաւարտներուն՝ հասնելու համար կատարեալին:

Յատուկ շնորհակալութիւն դոկտ. Գարայեանին եւ ՀԲԸՄի «Պապայեան» հիմնարկին, որոնց քաջալերական այս կեցուածքը բարոյապէս մեծ նշանակութիւն ունի վարժարանիս եւ հայկական բաժանմունքին համար: Կը մաղթենք անոնց յարատեւութիւն եւ յաջող երթ՝ իր հայանպաստ նուիրական աշխատանքին մէջ, յուսալով աւելի սերտ գործակցութիւն, ի սէր մեր զաւակներու հայեցի դաստիարակութեան: